



Progetu finantziu cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

## Maschinganna.

Una noti unu pastori fiat pascendu su tallu candu at biu pesendusi-ndi de terra una grandu columna e, cantu prus issu dda castiàt cantu prus custa si-ndi pesàt. Su pastori iat pentzau luegus chi fessit Maschinganna, e, mancai fessit timendu meda, at sighiu a s'acostai fintzas a candu sa columna no at tocau su celu e apustis dd'at bida calai e sparessi cumentis sa nèbida.

Su pastori at sighiu a caminai e naràt:

- Mancai tui ti bollas arriri de mei non m'as a biri torrendu agoa;

Totinduna at biu in terra una bella pipa, e, luegus at pentzau ca custa fessit Maschinganna e ndi-dd'at assoddida e at sighiu a caminai. Candu caminendi-caminendi dda teniat in mandu castiendi-dda, sa pipa s'est fata a arrogus ca pistinchendi ant pigau fogu, apustis custas framas si funt pinnigadas e ant formau unu grandu fogu.

Su pastori s'est fuiu ma su fogu dd'at sighiu avatu e dd'at ingiriau. Issu intendiat su fogu ma custu non dd'abruxàt. Una cosa sceti ddu podiat sarvai e issu dd'at pronunziada:

- Nostra Sennora mia!

A Custus fueddus su fogu est sparèssiu e issu s'est sarvau e non at sighiu a bandai a innantis.

Una noti ddus pastoris ca fiant torrendu de su cuili, candu fiant arribaus a Pinnia, e candu fiant brinchendu s'arriu, ant biu unu porcu e ant nau:

- De chini at a essi custu porcu e poita at a essi innoi?

In s'interis chi s'acostànt su porcu pariat sèmpiri prus mannu, fintzas a candu est arribau a su celu e est torrau piticheddu. De sighiu s'est mudau in framas, ca s'intendiat fintzas su

sonu de is framas e pariat ca su fogu bolessit abruyai fintzas is pedras. Is pastoris bidendu custu si-ndi funt atzicaus meda.

Candu custas framas si funt studadas ant biu ca non nci fiat nudda de abruyau e apustis ant biu su fogu torrai a porcu e mudai in nui e proi apitzus de issus. Intendiant fintzas s'acqua calai ma custa non ddus inciundiat.

Is ddus pastoris si funt fuius credendi chi fessit Maschinganna. Ant intèndiu fintzas s'arriu fadendu-sì mannu, aici mannu ca po cussa noti is ddus pastoris non funt pòtzus passai e iant dèpiu abetai sa diri de apustis.